




BILTEN

INFORMATIVNE NOVINE ISLAMSKE ZAJEDNICE BOŠNJAKA U ŠVEDSKOJ—DECEMBAR 2021. / BROJ 46





BILTEN

46

Decembar 2021. / Džumade-l-ula 1443.

Sadržaj

- 4 Uvodnik
- 5 Intervju
- 13 Aktivnosti iz Zajednice
- 30 Duhovnost

INFORMATIVNE NOVINE
ISLAMSKJE ZAJEDNICE BOŠNJAKA U ŠVEDSKOJ



**DA JE ŠVEDSKA OD DŽENNETA DIO
MALMO GRAD BI DŽENNET BAŠČA BIO
GETEBORG DŽENNETSKA KAPIJA
A VETLANDA DŽENNETSKA AVLIJA**

**TRELLEBORG DŽENNETSKA KAPIJA
A LANDSKRONA DŽENNETSKA AVLIJA**

**KEVSER VRELO NA TRUSI BI BILO
U BOROSU PODNE BI UČILO
JONČEPINGU SABAH SE KLANJAO
KALMAR VODOM ABDEST UZIMAO**

**LINČEPINGU SABAH SE KLANJAO
HALMSTAD VODOM ABDEST UZIMAO**

**MOJ ALLAHU, HVALA TEBI SADA
CIJELA ŠVEDSKA, CIJELA ŠVEDSKA
NA SEDŽDU TI PADA**

**AKŠAM NAMAZ U ŠEVDE BI BIO
NORČEPINGU KUR'AN BI SE UČIO
U VERNAMU KURBAN BI SE KLAO
GISLAVEDU MEVLUD ODRŽAO**

**TROLHETANU VAKUF BI SE IMAO
GISLAVEDU MEVLUD ODRŽAO**

**U ŠTOKHOLMU JACIJA BI BILA
SEDŽDA BI SE U MOTALI ČINILA
VESTEROSOM DŽENNET NUR BI SJAO
U OREBRU ALLAH VELIČAO**

**HELSINBORGOM DŽENNET NUR BI SJAO
A U VEKŠU ALLAH VELIČAO**

**MOJ ALLAHU, HVALA TEBI SADA
CIJELA ŠVEDSKA, A BOSNA
NA SEDŽDU TI PADA**

**Cijela Bosna, cijela Bosna na sedždu Ti
pada...**

**Allahovim emerom, kroz naše džemate i
cijela Švedska,
Cijela Švedska na sedždu Ti pada...**

Izvode:

Erna Jakupović i Suana Baručić, Bemuf Gislaved

Obrada teksta: hafiz Adis ef. Baručić, Gislaved



Često smo u prilici slušati različite fraze. Bez nekog ozbiljnijeg razmišljanja prihvatimo ih i one neprimjetno postanu osnova za neke naše stavove. Ponekad na taj način uđemo i u grijeh, a da toga uopće nismo svjesni.

Nedavno smo posjetili naš džemat Örebro i bili u prilici vidjeti prelijepi novosagrađeni vakufski objekat ovog našeg džemata. Nakon što smo iskazali riječi divljenja i dove Allahu, dž.š., da nagradi sve one koje su na bilo koji način doprinijeli da se ovaj objekat izgradi, jedan od prisutnih džematlija reče: „Jeste, ali smo se, vala, i nadavali para i para da se ovo završi.“

Samo što ovaj završi, džematlija pored njega reče: „Vala, kad ovo sad vidim, meni je samo žao što još više nisam davao.“

Nakon toga je zavládala tišina. Kao da su svi prisutni razmišljali o ove dvije iskreno izrečene rečenice. U izrazu lica onog prvog džematlije vidjelo se negodovanje, jer je očito bio svjestan da bi njegova konstatacija mogla biti shvaćena kao prigovor na ono što je dao, dok drugi, kao i većina ostalih, nisu mogli sakriti svoju sreću i zadovoljstvo.

Uz dovu Gospodaru svjetova da nam omili davanje u Njegovo ime, neka u ovom kontekstu bude citiran hadis i Poslanika, s.a.v.s, u kojem je rekao:

” Kad vaši poglavari budu najbolji među vama, i vaši imućni najdarežljiviji, a vi budete svoje važne poslove obavljali dogovarajući se među sobom, onda vam je bolje da živite na zemlji nego pod zemljom.“

IDRIZ-EF. KARAMAN
GLAVNI IMAM



INTERVJU

Smajo-ef. Šahat

POŠTOVANI SMAJO-EF., HVALA VAM ŠTO STE PRISTALI DA GOVORITE ZA BILTEN NAŠE ZAJEDNICE. DUGOGODIŠNJI STE IMAM ISLAMISKE ZAJEDNICE BOŠNJAKA U ŠVEDSKOJ, MNOGO NAŠIH DŽEMATLIJA I ČITATELJA VAS POZNAJE, ALI ZA SVE NJIH, KAO I ZA ONE KOJI VAS NE POZNAJU, PODIJELITE NEKOLIKO, PO VAMA, NAJVAŽNIJIH DETALJA IZ VAŠE BIOGRAFIJE?



SMAJO-EF.:

Hvala Allahu Koji nas je uputio. Bez Njegove upute i blagodati sigurno bismo zalutali. Salavat i selam na Allahovog miljenika i najboljeg uzora, Muhammeda s.a.v.s. Iskreno, zahvaljujem na ponudi i prilici da nešto kažem za naš Bilten naše Zajednice.

Ne mislim da ima nešto posebno što bih mogao kazati sam o sebi a da bude zanimljivo čitateljima. Ukratko, rođen sam u skladnoj, tradicionalnoj bošnjačkoj porodici u predjelu Istočne Bosne, u januaru mjesecu 1966 godine. U jednom izuzetno lijepom selu, G. Strmica kod

Rudog. Šesto sam dijete po redu mojih rahmetli roditelja, Huse i Nure. Molim Uzvišenog Gospodara da im oprostí grijehe i da ih Svojom milošću vječno nastani u Džennetu! U toku mog osnovnog obrazovanja u rodnom mjestu, bio sam, kao i mnoga djeca u to vrijeme, čobanin. Bio je to zaista lijep vakat za koji me vežu najljepše uspomene.

Babo mi je bio imam u mom mjestu koje obuhvata nekoliko sela, te sam ga još kao dijete volio oponašati u onom što je imamska zadaća. I ne samo to, volio sam da ličim na njega, da npr. uzmem i obučem njegov kaput kako bih izgledao odrastao, uozbiljen, mudar i iskusan kao on. Ne bih baš bio oduševljen babo kada bih me vidio u avliji s njegovim cipelama na mojim nogama. Tako, nakon osnovne škole nije bilo dileme da upišem Gazi Husrev-begovu medresu i tako ostavim društvo i selo Strmicu i preselim u Sarajevo. Više od svega želio sam da budem kao moj babo, da budem predvodnik, tumač Islama, da budem imam. Sedmero je djece, nas 4 brata i 3 sestre. Imamska plata mog babe je bila zaista simbolična, pa se nafaka tražila u zemljoradnji i stočarstvu. Tu smo bili svi uključeni. Ideja Islama i tumačenje Islama je moje opredjeljenje, kako tada tako i danas. Nakon odsluženja vojnog roka 1988 godine, zasnovao sam radni odnos kao imam i vjersko-prosvjetni referent Odbora Islamske zajednice Rudog. Godinu dana poslije oženio se mojom hanumom Zehrom, a u julu 1990 Allahu hvala dobili i sina. Na žalost, zbog agresije na Bosnu i Hercegovinu moja služba u Rudom nije potrajalo dugo. Nakon teških iskušenja našli smo utočište u Švedskoj gdje smo evo i sad.

NAŠI ČITATELJI SU UPOZNATI SA GENERACIJSKIM PROJEKTOM, ODNOSNO TRENUTNOM IZGRADNJOM DŽAMIJE U DŽEMATU SKÖVDE. KOLIKO JE VAŽAN I ŠTA OVAJ PROJEKAT ZNAČI ZA VAS, ZA DŽEMAT SKÖVDE, GRAD SKÖVDE I ČITAVU ZAJEDNICU?

Hvala na ovom pitanju i interesovanju za ovaj dugo najavljivani projekat. Džamija je uvijek bila duhovna osa oko koje se odvijao cjelokupni muslimanski život. Mi, muslimani ovog prostora, živimo bez te ose, a znamo da su kroz historiju naše džamije, ali i čitavi gradovi, nicali na paradigmi vakufa, vlastitog individualnog žrtvovanja za opšte dobro. Eto, i ovaj Vakufski odbor je vođen tom idejom, da udari prve temelje našeg vakufa, da eventualno na tridesetogodišnjicu etabliranja džemata stavimo vakuf u funkciju. Jer, trideset godina u životu jednog čovjeka obično pokaže njegovu snagu, zrelost, dostignuće i put u kom smjeru ide. Isto vam je i s džematom, Zajednicom. Džemat Skövde nije daleko od toga da postane tridesetogodišnjak.

Dajem evo priliku svakom od nas, da razmislimo i razumijemo ono što je kazao poslanik Islama, Muhammed alejhisselam, koji je rekao: "Ko se kod svoje kuće očisti a zatim ode u jednu od džamija da obavi jedan od Allahovih farzova, jednim korakom mu se oprašta grijeh a drugim podiže stepen (u Džennetu)". (Prenosi Muslim)

Pitanje koje postavljam sebi je; u koju džamiju ću ja, u koju će moja djeca, imamo li tu oazu mira gdje podižemo naše stepene u Džennetu? Još uvijek nemamo! Ali ćemo, ako Bog da imati!





Svjesni smo, projekat na izgradnji džamije u džematu Skövde je od izuzetnog značaja, svim muslimanima jako važan. Međutim, izgradnja džamije u Skövdeu, kao i na bilo kom drugom mjestu, je društveno važan projekat i od velike koristi.

Džamija je mekteb, u njoj se naša djeca, te mlade vočke kaleme i odgajaju kako bi mogli biti njen džemat i kako bi stasali u odgovorne članove društva i zajednice, a onda svojim zalaganjem širili džamijski prostor. Tako, izvjesno je već sad da ćemo mi uz Allahovu pomoć i pomoć vjernika finalizirati ovaj projekat, ovu džamiju. Ona će biti, ako Bog da, svetionik i orjentir generacijama koje dolaze poslije nas. Biće to pokazatelj i simbol egzistiranja muslimana na ovom prostoru. Ono što još trebamo uraditi jeste da radimo na podizanju svijesti džematlija, posebno mladih koji

bi bili ponosni na svoja islamska obilježja, kao što su, recimo ljekari ponosni kad im uz ime stoji titlula Dr. ili neka druga titula. Na kraju, ne treba smetnuti s uma i ovo. U islamskom razumijevanju svijeta, postoji institucija koja se zove vakuf – to je slično fondaciji koja omogućava razvoj drugih kulturnih, obrazovnih i vjerskih institucija i projekata. Nadati se da će, ako Bog da, iz ove džamije nicati i drugi, za sve muslimane i društvo u cjelini važni sadržaji!

KAO DUGOGODIŠNJI IMAM U NAŠOJ ZAJEDNICI, ALI I KAO IMAM SA KONTAKTIMA I ISKUSTVOM RADA U DRUGIM ŠVEDSKIM INSTITUCIJAMA, ŠTA BI PO VAŠEM MIŠLJENJU BILI PRIORITETI I VAŽNE STVARI ZA NAŠE DŽEMATLIJE I OMLADINU?

Islam se temelji na principu naređivanja dobra i radu za opće dobro te odvrćanju od zla. To je u stvari neizostavan prioritet svakog od nas. U namjeri da učinimo što je moguće više dobra, sa mnogima surađujemo na tom putu u mjeri i u dobroj vjeri. I lično ulažem svoje vrijeme i dosadašnje iskustvo u pronalaženju puteva za saradnju s drugim i drugačijim. Barem ja to smatram neminovnošću ukoliko želimo, a nadam se da svi želimo, graditi živu, otvorenu i inkluzivnu Zajednicu.

Švedska, kao i druge države ima svoje specifičnosti u logici, historiji i kolektivnoj psihologiji. Nama bošnjacima je vrlo važno naše samopouzdanje u muslimanski, bošnjački pa i evropski identitet. Ne trebamo se nikom izvinjavati što smo muslimani, Bošnjaci. Trebamo svi zajedno izgraditi osjećaj ponosa na to što jesmo i da tako živimo sasvim opušteno. Doći na stepen gdje poštujemo sami sebe je izuzetno važno. Da znamo svoja načela i živimo zajedno u miru s drugim svjetonazorima.



Allahov Poslanik, s.a.v.s., nas uči da je vjera u stvari – savjet i savjetovanje. Život na ovom geografskom prostoru sa sobom nosi brojne izazove, stoga je potrebno da se ne prestano savjetujemo i međusobno pomažemo. Musliman je slab kada je sam, otuda se muslimani

pozivaju u džemat u Zajednicu, tu su snaga dobra, snaga lijepe promjene i sigurnosti.

Mišljenja sam da su naši džemati, općenito govoreći povučeni u sebe, ućahureni u nastojanju da samostalno djeluju. Osjećam da smo razumjeli naše okruženje kao strano, tuđe i vrlo često okrenuto protiv nas. Ne bavimo se dovoljno okruženjem i saradnjom s okruženjem, vrlo rijetko smo uključeni u poslove i programe kulturnih, obrazovnih i drugih projekata na lokalnom ili regionalnom nivou. Ne može se zamisliti bilo kakva budućnost muslimana u Švedskoj, pa ni u Evropi ako muslimani odbijaju da imaju veze s okolinom i ako ne razviju izravne kontakte i saradnju koji će im omogućiti da daju i da primaju od drugih. Posebno se ovo odnosi na našu aktivnu omladinu, koji dobro govore jezik-e, koja je uključena u aktivnosti naših džemata. Podvlačim, naša Zajednica ne smije biti ućahurena sama u sebe, ona mora biti živa, širom otvorena, da sama promovira saradnju, da bude inkluzivna Zajednica.

Na kraju, živimo u jednom sekularnom društvu gdje imamo javni prostor koji je postao donekle antireligijski, prožet jakim nabojem materijalizma koji je toliko djelotvoran da ponekad izgleda da je iluzorno i pomisliti da je bilo koja vrsta otpora moguća.

Želimo li da uspijemo u suočavanju sa izazovima te vrste, mi sami moramo da preduzimamo brojne inicijative unutar naših džemata. Svjestan sam, svaka od tih inicijativa zahtjeva znatan rad i po sebi je izazov kojemu svaki musliman, čovjek i žena, mora doprinijeti. Naše kapacitete te vrste, koliko god je to moguće, u tom smjeru trebamo jačati.

ŠTA SMAJO-EF. RADI U SLOBODNO VRIJEME? KAKO SE ODMARA, KAKO "PUNI BATERIJE" ZA SVAKODNEVNE IZAZOVE I OBAVEZE?

Hasan el-Basri je govorio: "Zbilja, vrijeme svako jutro poziva čovjeka: 'O čovječe, iskoristi me, jer ja ti se, tako mi Allaha, nikad neću vratiti!'"

Najviše što danas insanu fali je nešto malo slobodnog vremena. Oni koji ga imaju, bagatelišu ga i provode u razonodi ili ga "ubijaju". Svjestan sam, za psihičko i fizičko zdravlje izuzetno je važno imati pauze, vrijeme za resetovanje. Zar nije blagodat za insana pet propisanih stanki u toku 24 sata, pet vakata namaza!? To je konstantno dopunjavanje baterija, duhovno napajanje.

Naći vremena za dopuniti baterije za nastavak uspješnog angažmana na putu ostvarivanja zadatih ciljeva je neminovno. Svakako, postoji i mnogo drugih načina za odmor i punjenje baterija, zavisno od toga kakav život živimo.

Dobre ideje za aktivnosti u slobodno vrijeme su definitivno razni vidovi fizičkih aktivnosti kojima se i ja povremeno prepuštam. Experti vele da je izuzetno važno naći sebi oduška u slobodnom vremenu u onom što voliš, što opušta - ali vele isto tako da nas previše slobodnog vremena može umrtviti, unesrećiti. Znači, kao i u svemu i ovdje mora postojati neki vid balansa, ni previše ni premalo slobodnog vremena.



Iskren da budem, odmara me druženje i kahvenisanje s prijateljima, s mojim džematli-jama. Učiti Kur`an, čitati ili pročitati neku lijepu knjigu. U zadnje vrijeme osjećam da me jako opušta i nadahnjuje duga šetnja kroz borovinu u Skövdeu, to me ujedno vraća u djetinjstvo i lijepo se osjećam. Ranije sam uživao poigrati fudbal, danas više volim pogledati dobru fudbalsku utakmicu, posebno onu u kojoj igra naš dijamant, Edin Džeko. Međutim, u ovom zadnjem periodu moja najviša inspiracija i ugođaj je rad na projektu izgradnje džamije. To zaista radim s velikim zadovoljstvom, uživam.



POŠTOVANI SMAJO-EF. HVALA VAM NA IZDOJENOM VREMENU! NADAMO SE DA ĆE SLJEDEĆI PRILOG ILI INTERVJU ZA NAŠ BILTEN BITI POZIV NA OTVOR NOVOIZGRAĐENE DŽAMIJE U DŽEMATU SKÖVDE, AKO BOG DA!

Vjerujemo u to, sve se događa Allahovom voljom i u skladu sa Njegovim planom. Tu ne izostaje naš angažman, i kontinuirano radimo na tome.

Koristim ovu priliku, u ime Vakufskog odbora džemata Skövde, da se zahvalim svima onima koji su nas do sada pomogli u ovom projektu i poziv da nas i dalje podržavaju, jer je to naša zajednička sreća!

Allah Uzvišeni vam višestruko vratio! Molim Gospodara života i smrti da nas učini svjesnim muslimanima u ovom vremenu, u ovoj državi, u ovom dijelu svijeta, i da nas Uzvišeni Gospodar pomogne u očuvanju jedine nam Domovine, Bosne i Hercegovine!

AMIN!



Islamska zajednica Bošnjaka u Švedskoj
DŽEMAT SKÖVDE

Izgradimo zajedno

VAKUF

U džematu Skövde

Uplate iz Švedske

Uplate iz inostranstva

Bankgiro: 5223-2477

Svish: 123 168 48 51

Bank: Skandinaviska

Enskilda Banken AB

IBAN: SE8350000000

051701191512

BIC (Swift): ESSESESS

«Ko izgradi džamiju na ovom svijetu Allah će njemu sagraditi dvorac u džennetu.»
(Buharija i Muslim)

Kontakt: Smajo-ef. Šahat / +46 70 497 04 18 / sahatmajo@gmail.com¹²



AKTIVNOSTI IZ ZAJEDNICE



PHOTO ALBUM

**Završna manifestacija Islamske zajednice
Bošnjaka u Švedskoj za 2021. godinu**

Gislaved, 2021-12-04



Idriz-ef. Karaman, glavni imam



Hor imami IZBUŠ-a



Emir Prlija,
predsjednik IZBUŠ-a



Kenan Zec, predsjednik Bemuf-a



Hafiz Adis-ef. Baručić,
imam džemata Gislaved






Mekteb Gslaved



ODRŽANA SJEDNICA IZVRŠNOG ODBORA IZBUŠ-a



U subotu, 11. decembra 2021. godine, održana je online sjednica Izvršnog odbora Islamske zajednice Bošnjaka u Švedskoj.

U prvom dijelu sjednice razmatrana je realizacija odluka sa prethodne sjednice, te izvještaji članova IO IZBUŠ-a za protekli period.

U drugom dijelu Izvršni odbor je razmatrao predstojeće aktivnosti, pri čemu je najviše prostora zauzela priprema Skupštine IZBUŠ-a za 2022. godinu. Uz prethodnu konsultaciju sa predsjednikom Skupštine, Izvršni odbor je donio odluku da se ovo zasjedanje, umjesto 19. marta, održi 12. marta 2022. Razlog tome je što u prvobitno planiranom terminu nisu slobodne prostorije u Norra Hammaru, gdje će se Skupština održati.

Na kraju je Izvršni odbor razmatrao pristiglu poštu, te na osnovu zahtjeva iz džemata izvršio raspodjelu sredstava namijenjenih za obilježavanje rebiu-l-evvela.

I.K.

U GRADU JÖNKÖPING ODRŽAN SEMINAR IMAMA IZBUŠ-a



U ponedjeljak, 29. novembra 2021. godine, održan je seminar za imame Islamske zajednice Bošnjaka u Švedskoj.

Tema ovog seminara bila je kako unaprijediti mektebsku nastavu, a obrađena je kroz tri sesije, demonstracijom po jednog časa nastave iz ilmihala i sufare, te referatom o korištenju alata i pomagala u mektebu.

Na svim sesijama vođene su, zaista, izvanredne diskusije u kojima su imami pokazali koliko vode računa o mektebu i sa koliko kreativnosti pristupaju ovoj obavezi.

U drugom dijelu seminara govorilo se o nekim problemima sa kojima se susreću imami u organizaciji mektebske nastave, kao i načinu kako ih prevazići.

Po ocjeni svih prisutnih imama bio je ovo jedan od najboljih seminara organiziranih u Islamskoj zajednici Bošnjaka u Švedskoj.

I.K

Džemat Landskorona

DRUŽENJE DŽEMATA HELSINGBORG I LANDSKRONA

Dana 15. oktobra u kordinaciji dva džemata, Helsingborg i Landskrona, održano je zajedničko druženje. Domaćin je, ovaj put, bio džemat Helsingborg.



Poslaniku a.s. Druženje je nastavljeno uz fiku i ugodan razgovor naše omladine, omladine iz Malmö i Helsingborg, te predstavnicima iz glavnog odbora Bemufa.



Različite koronamjere, koje su uveliko ograničavale okupljanja, rezultirale su da je u džematima održavan manji broj druženja.

Večerašnje druženje je, ako Bog da, uvod u veći broj okupljanja u periodu koje je pred nama.

Suad-ef. Kazaferović je prisutne počastio kraćim predavanjem o poslaniku Muhammedu, alejhi selam, nakon čega je priređen i kviz za sve prisutne. Svi su bili aktivni, a nekoliko njih je i simbolično nagrađeno knjigama.

Radujemo se narednom susretu, novim temama i još brojnijem skupu.

SKUPŠTINA BEMUFA LANDSKRONA

22.10.2021. poslije jacije namaza je održana skupština Bemufa našeg džemata, te je izabrano novo rukovodstvo Bemufa. Nakon skupštine naš imam je održao predavanje za omladinu, a potom smo imali kviz znanja o

POSJETA DŽEMATU HALMSTAD



23.10.2021. imam našeg džemata, sa nekoliko naših džematlija je posjetio džemat Halmstad.

Razlog ove posjete je bio mevlud Poslaniku Muhammedu a.s koji je održan iste večeri poslije akšam namaza.

Suad-ef. Kazaferović je održao predavanje ovom prilikom. Nakon jacije namaza nastavljeno je druženje džematlija ova dva

džemata. Posjeta ljud ina mevludu je bila iznimna.

DŽEMATSKI MEVLUD, GODIŠNJICA DŽEMATA I PROMOCIJA UČAČA KUR'ANA



30.10.2021. u prepunoj džamiji, smo povodom mubarek mjeseca rebiul evvela, obilježili mevlud Poslaniku Muhammedu a.s.

Također, smo obilježili 27 godišnjicu od osnivanja našeg džemata, koji je osnovan 01.10.1994. godine. Danas nas džemat stameno, ispravno i sigurno stoji, a dio je ogromne porodice Islamske zajednice Bošnjaka u Švedskoj.

Posebno lijep trenutak je bio promocija 34 nova učača Kur'ana u našem džematu.

20 djece, 9 hanuma i 5 muškaraca. Njima smo uručili skromne poklone i zahvalnice.



Imali smo veliki broj gostiju iz džemata Gislaved, Växjö, Halmstad i Helsingborg.

Program su izveli mektebski, zatim mektebski hor, naš Bemuf, imami iz džemata Gislaved, Treleborg, Halmstad i Helsingborg, mualime iz džemata Treleborg i Landskrona, naš dugogodišnji imam Nesib-ef. Makić, te uvaženi glavni imam IZBUŠ-a, Idriz-ef. Karaman, koji je održao predavanje ovom prilikom.

Nakon programa svi učesnici, gosti i džematlije imali su priliku da zajedno večeraju i da se druže.

POSJETA MEKTEBU LJEKARA DR. EDINA MAHMIĆA I STOMATOLOGA DR. EDINE MAHMIĆ

Dana 20.11.2021. smo u sklopu mektebske nastave, imali posjetu naših džematlija, stomatologa Dr. Edine Mahmić i njenog supruga ljekara Dr. Edina Mahmića. Oni su našim mektebskim učenicima održali predavanje o zdravlju, zatim o zdravlju zuba, higijeni i načinu kako se odnosimo prema svom zdravlju i zdravlju naše djece. Na kraju su podjelili prisutnoj djeci bogate poklone za higijenu zuba, a potom smo imali kraće druženje uz lijep razgovor, kahvu i slatko. Iskreno im se zahvaljujemo od srca.

OBILJEŽAVANJE DANA DRŽAVNOSTI BiH I DANA SANDŽAKA

Dana 27.11.2021. smo obilježili Dan državnosti Bosne i Hercegovine i dan Sandžaka, u dvorani



Seminarieskolan. U prvom dijelu, imali smo vjerski program (ilahije, domoljubne pjesme i recitacije), zatim sportski (turnir u malom nogometu i odbojci), za mektebske učenike, na kraju smo imali kulturni dio programa u kojem su naši učenici zajedno sa " BKF Ljiljan " izveli folklorni dio programa. Najuspješniji u sportskim igrama su dobili medalje i pehare.



U svom obraćanju imam džemata Suad-ef. Kazaferović, između ostalog je poručio:

"Danas smo pokazali da nismo zaboravili ko smo i šta smo i odakle potičemo.

Gdje god žive Bošnjaci, tu živi i Bosna i Sandžak!

Gospodaru čuvaj nam domovinu, a mi sigurno hoćemo!

Zahvaljujemo se svima koji su uzeli učešće u realizaciji ove manifestacije, našem džematu, rukovodstvu džemata, osoblju škole, roditeljima, mektebskoj djeci, BEMUFU Landskrona i svima vama koji ste se odazvali i uveličali današnji skup. Hvala na lijepom i ugodnom druženju."

Konpletan program su izveli mektebski učenici, njih 50, zajedno sa svojim muallimima Suad-ef. i Fatimom Kazaferović.

UZVRATNA POSJETA DŽEMATU GISLAVED



U subotu 04.12.2021. je grupa džematlija iz našeg džemata, uzvratila posjetu džematu Gislaved, gdje je održana završna svečanost IZBUŠ-a. Hvala našim domaćinima, njihovom imamu i IZBUŠ-u na divnom programu i dočeku. Molimo Uzvišenog Boga da nam svima ovo druženje upiše u knjigu dobrih djela. Amin!

Naime, u mjesecu oktobru, imam džemata Gislaved sa Bemufom Gislaved su posjetili naš džemat na svečanosti obilježavanja 27 godišnjice džemata Landskrona i mevludu koji

smo održali u čast našeg Poslanika Muhammeda a.s.

POSJETA STUDENATA SA MALMÖ UNIVERZITETA

Početak mjeseca decembra, imali smo intervju sa studentima sa Malmö Univeziteta.

U svrhu njihove fakultetske nastave, razgovarali smo o sljedećim pitanjima:

-Opišite svoj svakodnevni život kao muslimana (namaz, hrana i post)?

-Što je za vas smisao života?

-Je li vaš svakodnevni život kao muslimana pogođen? Ako je tako, zašto?

-Jeste li se morali prilagoditi društvu u Švedskoj? Ako vam je bilo potrebno prilagođavanje, je li bilo teško?

- Što mislite o utjecaju medija na religiju? Utječu li mediji na pogled na islam?

Intervju sa imamom Suad-ef. Kazaferovićem, obavili su:

Dževad Čeliković, Ahmed Al Zagnonn i Hussain Mahdi.

Zahvaljujemo se Univerzitetu i studentima na suradnji!



POSJETA NOVINARA I ISTRAŽIVAČA SA LUND UNIVERZITETA

Dana 10.12.2021. na džuma namazu imali smo posjetu jednog švedskog novinara i istraživača, koji radi diplomski rad na Lund univerzitetu iz oblasti teologije. On je prisustvovao džumi namazu, a nakon džuma namaza je intervjuisao našeg imama. Razgovaralo se je o meshebima u islamu i koje su različitosti u obredoslovlju kod muslimana po meshebima. Naravno neizostavan dio je bio stanje u džematu po pitanju članova, djece u mektebu i omladini, a svakako integracija bošnjaka-muslimana u švedsko društvo.

Suad Kazaferović



Džemat Trelleborg



U mjesecu rebiu-l-ewvelu, tačnije 23. oktobra, nakon prestanka svih korona restrikcija, dočekali smo da nakon dužeg perioda organiziramo jedno veče okupljanje.

Povoda je bilo mnogo. Stoga, smatram da bi bilo lijepo da ove novosti podijelimo sa čitalačkom publikom IZBUŠ-ovog Blltena. Uz prisustvo uvaženih kolega hafiza Adisa ef. Baručića, Hasana ef. Jašarevica, Ibrahima ef. Terzića i glavnog imama Islamske zajednice Bošnjaka u Švedskoj Idriza ef. Karamana, posebnu notu toj večeri pridodala su omladina Bemuf- Gislaved. U uvodnom dijelu svojim milozvučnim glasom počastio nas je Hasan ef. Jašarević, a u nastavku programa imali smo priliku da slušamo stihove mevludi-šerifa te emotivnu interpretaciju nekoliko ilahija i kasida u izvedbi Rukaje Podojak-Mehtić.

Program je upotpunjen vazi-nasihatom glavnog imama Idriz ef. Karamana u kojem je, na sebi sopstven način, prisutne pozvao na studioznije izučavanje sire-životopisa Allahovog Poslanika a.s.

Pri samom završetku programa glavni imam je uručio diplome prvoj generaciji polaznica Online intenzivnog kursa Kur'anskog pisma – sufare.

Njihova imena želim da spomenem u ovom tekstu, kao podstrek svima onima koji se dvoume u pogledu učenja Sufare. One su primjer da se može, samo imajmo na umu da za bilo koju aktivnost, kako naš narod kaže: "Treba dobra volja".

Generaciju šest novih učaca časnog Kur'ana čine: Elzana Baličevac, Atifa Grlić, Medina Henić, Adijana Kajić, Maida Mulić i Amela Cetina.

Nakon dodjele diploma, glavni imam Idriz ef. Karaman je iskoristio priliku da prisutne džematlije pozitivno iznenadi dodjelom dekreta Rijasetu Islamske zajednice u BiH, Ismail ef. Mehtiću, o postavljenju na mjesto imama, hatiba i muallima u džematu Trelleborg. Uz dove za nastavak uspješnog rada na mjestu imama uručen mu je prigodan poklon kako od glavnog imama tako i od IO Trelleborg.

Imam, Ismail Mehtić

Džemat Trollhättan



DŽEMAT TROLLHÄTTAN U VLASTITIM PROSTORIJAMA!

Dan 1. novembar 2021 godine ostat će upisan i zapamćen kao datum kada je Islamska zajednica Bošnjaka u Švedskoj postala bogatija za još jedan objekat u svom vlasništvu. Uz pomoć džematlija, članova islamske zajednice diljem Švedske i i cjeloga svijeta i uz pomoć naših džemata, džemat Trollhättan je uspio da kupi objekat za svoje potrebe. Isti dan smo upriličili i prijem, to jest „otvorena vrata“ za sve džematlije koje su željeli da dođu i pogledaju nove prostorije.

Koristimo priliku da se zahvalimo svim našim vakifima i svima onima koji su na bilo koji način učestvovali u našoj akciji prikupljanja sredstava za kupovinu objekta.

Akcija jos uvijek traje i bice aktuelna dok džemat ne isplati i pozajmicu koju ima u iznosu od 1.750.000,00 kruna.

Prvi džuma-namaz smo obavili već 5. novembra i od tada aktivno koristimo naše nove prostorije. Trenutno pripremamo plan za adaptaciju, renoviranje i prilagođavanje objekta potrebama naseg džemata nadamo se da ćemo i to uskoro privesti kraju uz pomoć naših članova i prijatelja našeg džemata.

Molimo Allaha, dž.š., da koristi od ovog vakufa imamo svi do Sudnjega dana! Molimo Allaha, dž.š., da sve vakife nagradi obećanom nagradom!

MEKTEPSKA DRUŽENJA U DŽEMATU

U okviru svojih planiranih aktivnosti džemat Trollhättan organizuje zadnju nedjelju u mjesecu kao mektepsko druženje za sve polaznike mektepske nastave u našim novim prostorijama. To je prilika, osim da djeca prisustvuju zajedničkoj nastavi s obzirom da imamo punkt i u drugom gradu, da se djeca kao i roditelji upoznaju između sebe. Druženje traje po nekoliko sati u saradnji sa našom omladinskom organizacijom Bemuf gdje naša omladina priprema doručak ili ručak za sve prisutne.

Vrijeme iskoristimo i za obavljanje zajedničkih namaza gdje usput i ponovimo kako se klanjaju namazi, zatim održimo zajednički čas mektepske nastave, a potom djeca provode vrijeme radeći u različitim zabavnim radionicama gdje na njima zanimljiv i interesantan način upoznaju određene stvari i činjenice o našoj vjeri.

U planu nam je da, ako Bog da, u budućim druženjima uvrstimo i određene radionice na temu bosanskog jezika i naše kulture.

Tarik-ef. Buza



Bosniakiska kultur-islamiska församling Trollhättan
Islamska zajednica Bošnjaka u Švedskoj
Džemat Trollhättan

Organizuje:

MJESEČNU TRIBINU

Gost predavač:
Elvedin ef. Bešlija
(imam u džematu Borås)

Datum: NEDJELJA, 2021-12-26

Vrijeme: Poslije JACIJE NAMAZA (17:09 sati)

Mjesto: Gjutmästaregatan 1, Trollhättan

Džemat Borås



HATMENSKA SVEČANOST

U subotu, 11. decembra 2021. godine u džematu Borås, održana je hatmenska svečanost, povodom uspješnog završetka škole Kur' ana naših džematlija. Arapskim pismom i pravilima učenja Kur' ana ovladalo je 26 polaznika, različitih uzrasta. To je pokazatelj da uz dobru volju Allah podari i načina da se ostavre naše plemenite želje.


Ovim okupljanjem željeli smo iskazati iskrene čestitke, svima njima ali i probuditi želju kod onih koji još uvijek nisu krenuli ovim putem, da to učine.

Na žalost ovoj svečanosti iz različitih razloga nisu prisustvovali svi oni koji su pohađali školu Kur' ana.

Muhammed a.s. je one koji se druže sa Kur' anom opisao na seljdeći način: „Vjernik koji uči Kur'an i postupa po njemu je poput dunje, lijepog je i mirisa i okusa...” (Buhari)

Allahu učini Kur' an našim vodičem na ovom svijetu i šefadžijom na Ahiretu.

Elvedin-ef. Bešlija



Broj članova po džematima

	31.10.2020	31.10.2021
Malmö	1842	1990
Stockholm	1519	1642
Göteborg	1231	1278
Örebro	967	1046
Norrköping	941	996
Borås	915	970
Skövde	752	798
Västerås	648	703
Landskrona	626	681
Gislaved	644	675
Helsingborg	603	643
Värnamo	610	636
Linköping	530	567
Jönköping	513	545
Växjö	440	455
Trelleborg	423	422
Halmstad	388	422
Trollhättan	358	366
Motala	265	249
Kalmar	205	214
Varberg	170	189
Surte	158	159
Vetlanda	158	157
Trosa	103	136
Karlstad	95	108
Oskarshamn	18	20
Karlskoga	2	4
Ukupno	15124	16071





BOSNIAKISKA ISLAMISKA SAMFUNDET
ISLAMSKA ZAJEDNICA BOŠNJAKA U ŠVEDSKOJ

*“O, vi koji vjerujete, ako pomognete Boga,
On će vas pomoći i vaš hod učvrstiti.”!*

(Muhammed, 7.)

Članarina Islamskoj zajednici preko poreza

0.7%

VAŠA INVESTICIJA U NAŠU ZAJEDNIČKU BUDUĆNOST

Članarina za narednu godinu važi ukoliko ste pristupnicu potpisali i predali Islamskoj zajednici najkasnije do 31. oktobra tekuće godine !

Åkerssjövägen 10
461 53 Trollhättan

Telefon: 0520-49 90 64
Mobil: 0763-10 24 47

E-mail: kontakt@izb.se
www.izb.se

CRTICE IZ DUHOVNOSTI



أَسْتَغْفِرُ اللَّهَ

Oprosti mi Allahu

HUTBA



Hvala Gospodaru svjetova, salavat i selam Njegovom posljednjem poslaniku i miljeniku Muhamedu, s.a.v.s.

Draga braćo, poštovane sestre!

Danas govorimo o potrebi traženja oprost za učinjene grijeha. Činimo to na osnovu preporuke najboljeg učitelja Muhameda, a.s:

” O ljudi, tražite od Allaha oprost i pokajte Mu se. Ja oprost u svakom danu zatražim i po 100 puta.“

Preporuku za traženje oprost nalazimo i u životu prvog čovjeka i poslanika Adema, a.s. Kur`an bilježi njegovu i dovu hazreti Have nakon učinjenog grijeha:

„Oni odgovoriše: „Gospodaru naš, počinili smo sami prema sebi nasilje, i ako nam ne oprostiš i ne smiluješ nam se, bit ćemo, sigurno, među gubitnicima“ (El-E`araf, 23)

Preporuku za istigfarom nalazimo i kod drugih poslanika, a o tome govori i interesantna predaja, koja se veže za od jednog od najvećih autoriteta u islamu Ahmeda ibn Hanbela, koji je jednom čovjeku rekao: „Traži oprosta za grijeh.“ Nakon toga, došao mu je i drugi čovjek žaleći se na oskudicu, te i njemu Ahmed ibn Hanbel uputi isti savjet: „Traži oprosta za grijeh.“ Nedugo iza toga, dođe i treći čovjek, brižljivo se jadajući da mu je žena nerotkinja, a Ahmed ibn Hanbel ponovi isto što je prethodno rekao ovoj dvojici: „Traži oprosta za grijeh.“

Najzad, Ahmed ibn Hanbelu po savjet dođe i četvrti čovjek. Požali mu se da mu zemlja ne rađa, a Ahmed ibn Hanbel postupi kao i sa prethodnim nevoljnicima, reče mu: „Čini istigfar, traži oprosta za grijeh.“ Prisutni koji su se zadesili u blizini velikog učenjaka u čudu rekoše: „Zar svakome ko ti se na nešto potuži iste savjete daješ, svima i bez izuzetka govoriš: 'Traži oprosta za grijeh?'“ Ahmed ibn Hanbel na to im reče: „Zar nikada niste čitali Allahove ajete:

„Zatražite oprost od svoga Gospodar – On, doista, mnogo prašta – ja sam govorio. Nebo će vam izdašnim učiniti i imetkom vas i potomstvom opskrbiti, te za vas bašče i rijeke načiniti“ (Nuh, 10-12)

S istigfarom dolaze mnoga i ahiretska i ovosvjetska dobra i koristi čovjeku. Istigfar otključava vrata i riznice blagoslova do kojih se može doći samo izravnom Božijom pomoći i nadahnućem. Traženje oprosta od Boga je priznanje da Njemu dugujemo sve, jer On je Svemoćan i Sveznajući. Istigfarom svjedočimo da jedino Bog može olakšati naša stanja, otkloniti nedaće i iskušenja koja nas tište i da On mudro i pravedno upravlja

svim svjetovima, stanjima i stvorenjima. Istigfar čisti srce od licemjerja, karakter od oholosti, eho od umišljenosti. Što su ljudi čvršći i iskreniji u svome vjerovanju, oni su sve strožiji prema sebi. Takvi ljudi se manje oslanjaju na dobra djela koja su počinili, a više se plaše kazne Gospodara svjetova i skrušeno uzdaju u Božiju milost i oprost. Što su ljudi slabijeg vjerovanja i uvjerenja više su uvjereni u ispravnost vlastitog postupanja, manje se plaše kazne Gospodara, a na Božiju milost bezrezervno vjeruju kao da im ona bezuvjetno i neupitno pripada.

Ako smo zadovoljni sobom i umišljamo da imamo posebno i zagantirano mjesto kod Gospodara zanemarit ćemo istigfar, a zapast ćemo u nemar i neposlušnost. Istigfar nas podsjeća da kolikogod Allah Svemoćni ima savršenstva, toliko ljudi imaju mahana i nedostataka za koje se neprestano trebaju preispitivati, koriti i kajati.

A o snazi istigfara govori i 33. ajet iz sure El-Enfal:

„Međutim, Bog ih neće kazniti dok si ti među njima, i neće ih kazniti sve dok za oprost mole.“

Recimo na kraju i da je, pored traženja oprosta od Allaha, dž.š., potrebno tražiti oprost i od ljudi kojima se učini grijeh. Nikad ne treba biti teško priznati svoju grešku, izviniti se i zatražiti oprost. Zalog je to mnogo boljih međuljudskim odnosa. U tom smislu, molimo Allaha, dž.š., da nam omili traženje oprosta, ali i da nam omili praštanje.

Amin, ja Rabe-l-alemin!

Idriz-ef. Karaman,
Malmö, 10. decembar 2021.



O KUR'ANU I ISLAMSKIM ŠARTIMA

Šarti bi trebali biti skraćena Kur'ana, a oni to nisu. Ljudi ih smatraju definicijom islama, ali to nije slučaj. Šarti ne reprezentiraju sve bitne elemente Kur'ana, a po svom nazivu trebali bi to, i svi to opravdano očekuju. Stvara se lažan utisak o znanju islamskih šarta. Pogrešno znanje je opasnije od neznanja. Ne znam ko je definirao u današnjem obliku, ali ako oni ne odražavaju duh i cjelinu Kur'ana, nije ni važno kako se taj autoritet zvao. Naučavanje šarta postalo je zamjena za proučavanje Kur'ana. Skraćene metode su vrlo rizične i stoga vrlo odgovorne. One u sebi nose opasnost osakaćenja glavne misli, a same su podržavane duhovnom lijenošću ljudi. Lakše je naučiti pet šarta nego proučiti Kur'an. Gdje je poziv da se bude pravedan, istaknut na tako izričit način, gdje je naredba za dobru iznesena u ne manje izričitoj formi, gdje je ono "vjerujte i činite dobro", spomenuto na toliko mjesta u Kur'anu, ne ovaj put dobro u vidu namaza i posta nego dobro u općem, najširem, kur'anskom smislu? Taj poziv da se čini dobro, koji svojim učestalošću daje ton čitavom Kur'anu, i koji se nameće kao prvi i posljednji utisak duhu svakoga ko čita Kur'an, eto taj poziv nije našao mjesta ni u jednom šartu.

Ako stotinama godina, iz generacije u generaciju, ljudi dobivaju jednu defektnu, osakaćenu, krnjavu predstavu vodeće misli koja formira duh, shvatanja i ponašanja ljudi, zar je čudo da su rezultati na isti način defektni, nepotpuni, krnjavi.

Gledano kroz Kur'an, islam ima prije i iznad svega dva šarta: prvi - vjerovati, i drugi - činiti dobro. A ako neko misli da se to dobro može ukalupiti i ograničiti na namaz, post i zekat, taj čini vrlo lošu uslugu islamu, a prije svega veliku nepravdu prema samom sebi. Upravo se i radi o tome da su neke odredbe ahlaka trebale biti "šarti". Jedna od tih odredba svakako je misija dobra u svijetu - zahtjev koji je Kur'an, pored vjere u Boga, spomenuo najveći broj puta.

Čovjek može klanjati, postiti, pa čak i zekat davati (što je nešto teže), a ostati prazan. Moguće je licemjerno klanjati, nemoguće licemjerno biti dobar (ili ispravan) čovjek.

Glavna opasnost vjere ne dolazi, kako što se obično misli, od nevjernika. Prava opasnost dolazi od slabih, nedostojnih vjernika. Vjera je nastala, živjela i opstala u polemici ili hrvanju sa nevjerstvom.

Na Istoku sam vidio neke ljude u džamiji koji sa takvom rutinom uzimaju abdest da znaju da "operu" sve propisane dijelove tijela i - ostanu prljavi! Zar to nije ravno vještini da se skoči u bazen vode i ostane suh? Higijena se izgubila, ostala je samo simbolika. Ono što se ovdje dogodilo sa abdestom, dogodilo se sa svim ili gotovo svim islamskim propisima.

Islam se sveo na ritual, prazan i bez sadržaja. Naravno, posljedice u stvarnom životu su jednako porazne.

Zato ću, kada me neko upita, a posebno kada me upita moje dijete: šta je to islam, odgovoriti: to je vjerovati i činiti dobro. Zatim ću mu pričati o namazu, postu, hadžu, i na kraju naglasiti: ovo su obredi. Oni pripadaju vjeri, ako je tvoja duša ispunjena vjerom u Boga, a tvoje ponašanje činjenjem dobra. Ako toga nema, ti obredi su besmisleni kao i sve druge praznovjericke.

Situacija o kojoj je riječ, objašnjava nam zašto se, bez obzira na sve ljudske interpretacije islama, moramo uvijek ponovo vraćati izvorima islama, i Kur'anu kao glavnom izvoru. Samo je Kur'an čitava istina o islamu. On je Božija riječ. Šartovi su ljudski, odveć ljudski!

GLEDANO KROZ KUR'AN, ISLAM
IMA PRIJE I IZNAD SVEGA DVA
ŠARTA: PRVI - VJEROVATI,
I DRUGI - ČINITI DOBRO.

Alija Izetbegović
Septembar, 1978.
(Problemi islamskog preporoda, str. 107-110)

IBN HALDUN IMA PORUKU ZA NAS

Abdurrahman ibn Muhammed Ibn Haldun (1332-1406), jedan od najvećih umova islamske intelektualne tradicije i najpoznatiji po svom magnum opusu *Mukaddimi*,* pisao je o historiji, kulturi, društvu, civilizaciji i političkoj moći više nego bilo koji drugi muslimanski mislilac. Njegove duboke opservacije sjevernoafričkih društava, čiji je dio on bio, navele su ga da razvije interesantan koncept univerzalne historije i svjetske civilizacije.

Uz prvoklasni intelekt sa širokim interesovanjima u svim glavnim poljima znanja, Ibn Haldun je bio i mislilac i čovjek od djela. Neki ga smatraju osnivačem sociologije. Historičari se dive njegovoj mudrosti o usponu i padu velikih sila. Marksisti ga hvale zbog njegovih prodornih ideja o moći ekonomskih snaga u oblikovanju individualnih stavova i društvenih odnosa. Osmanski državnici i historičari su istraživali njegov pojam *asabijja* da objasne uspjehe i neuspjehe carstva tokom stoljećā. Neki ga vide kao najvećeg filozofa civilizacije. On je ličnost od ogromne koristi i trajnog značaja, bez obzira iz kojeg ugla mu priđete.

Sada, Ibn Haldun ima poruku za sve nas danas koji živimo u doba rastuće nesigurnosti i globalnog nereda. Ako je historija ikakav svjedok, a ona je glavni za Ibn Halduna, govori nam da je ključ za materijalnu i duhovnu dobrobit društva

zduženost i solidarnost. Ljudska bića su po prirodi *politička bića* u smislu da su primorani živjeti zajedno da očuvaju svoj rod, zadovolje svoje osnovne potrebe i ostvare svoj potencijal kako bi bili *civilizirani*. Razorne snage svojstvene ljudskoj prirodi su spregnute kada ljudi uče kako da koegzistiraju i pomažu jedni drugima. To zahtijeva niz moralnih i političkih principa oko kojih će biti ujedinjeni. Što je još važnije, ne postoji civilizacija bez metafizičke osnove. Oni koji gube svoju društvenu koheziju i grupnu solidarnost su prevaziđeni od drugih koji održavaju svoje jedinstvo, snagu i izdržljivost.

Za Ibn Halduna, najosnovnije pitanje je šta drži grupu ljudi zajedno i uvezane. Ovo je osnova svih kultura, civilizacije i političke moći ili vlasti (*mulk*). Bez ove osnovne komponente, nijedna grupa ljudi, pleme, klan ili veća zajednica ne mogu postići političku moć, izgraditi urbani život i sačuvati ga. Ovo je mjesto gdje upoznajemo Ibn Haldunov središnji koncept *asabijje*, to jeste, grupne solidarnosti i društvene zduženosti. (Teškoća prevođenja ovog haldunovskog termina i raznovrsni pokušaji da se on prenese u različite jezike potvrđuje svoj glavni značaj). *Asabijja* je ljepilo koje povezuje grupu zajedno. Daje im moć i sposobnost da se zaštite od vanjskih agresora. Ono im omogućuje da uspostave mir i poredak među sobom. Priprema ih za izgradnju *umrana*, to jeste, civilizacije.

Ali, ovo je također mjesto gdje se suočavamo sa glavnom haldunovskom dilemom: kada je grupa ljudi uvezana i osnažena asabijjom, kada dostiže urbani život i postiže civilizaciju, ljudi gube svoju društvenu koheziju i osjećaj solidarnosti. Kada pojedinci počinju da uživaju u prednostima i udobnosti civiliziranog života u urbanom okruženju, oni postaju slabi, lijeni i *previše ležerni* da se zaštite od juriša onih koji održavaju svoje *beduinske vrline* i ratničke kvalitete. Samo je pitanje vremena prije nego ih prevaziđu drugi.

U haldunovskoj paradigmi, cijena civilizacije je gubitak društvene kohezije, grupne solidarnosti i plemenitih osobina koje dolaze sa njima. Oni koji gube svoju asabiju također gube svoju *esalu*, to jeste, plemenitost. Ovo postaje opetovana tema, vječiti društveni ciklus u kojem plemena, narodi, države i carstva rastu i padaju. Ibn Haldun je smatrao da je životni vijek takvog ciklusa otprilike četiri generacije, to jeste, malo više od jednog stoljeća. On je također vjerovao da je najbitnija osnova društvene združenosti srodstvo. Ne postoji jača i održivija veza koja veže ljude zajedno. Niko se neće usuditi napasti one koji imaju jake srodničke veze. Ali, oni gube svoj osjećaj srodstva kada postanu stanovnici grada i urbanizirano-civilizirani pojedinci. Ibn Haldun ne vidi izlaz iz ove zagonetke: postizete moć, urbani život i civilizaciju kroz svoju asabiju; ali kada počnete uživati u prednostima sjedilačkog i civiliziranog života, gubite svoju koheziju.

Jasno, ova haldunovska teorija ima smisla u malim grupama kao što su plemena, ali zaostaje u objašnjenju većih društvenih jedinica i kako one dolaze zajedno da uspostave dugogodišnje države i carstva. Njegova teorija je dalje osporena

složenostima modernog svijeta u kojemu živimo. Dakle, šta da radimo? Odbaciti njegovu teoriju kao isuviše mikro-baziranu, plemensku i zastarjelu?

Odgovor je *ne*. Dokle god trebamo nastaviti problematizirati njegovu ideju društvene združenosti i grupne solidarnosti na osnovu srodstva i plemenskih veza, tako trebamo preraditi i protegnuti njegove analize da razumijemo ključna pitanja kohezije, urbanizacije i civilizacije u većim urbanim i globalnim okolnostima. To je hitan zadatak, posebno za savremeni muslimanski svijet koji pati od nedostatka i društvene združenosti i civilizacijskog jedinstva. Neuspješne i slabe države, nedržavni akteri, tribalizam, sektaštvo, etnički nacionalizam i niz drugih problema lišavaju muslimanska društva bilo kakvog *ljepila* koje će ih zaštititi od agresorā i realizirati njihove intelektualne i materijalne resurse zarad kulture i civilizacije.

Ibn Haldunov koncept društvene kohezije i kolektivne solidarnosti se odnosi na ono što Kur'an kaže u suri el-Enfal, 46. ajetu: *I pokoravajte se Allahu i Poslaniku Njegovu, i ne prepirite se da ne biste klonuli i bez borbenog duha ostali; i budite izdržljivi, jer Allah je, zaista, na strani izdržljivih*. Kada pripadnici iste grupe ili nacije počinju da se zavađaju jedni s drugima na destruktivne načine, oni gube svoj *vjetar*, to jeste, svoju snagu i posustaju u svakom aspektu života.

Krajnje je vrijeme za savremena muslimanska društva da čitaju Ibn Halduna u svjetlu njihove trenutne neprilike. Održavanje i društvene kohezije i urbane civilizacije može biti herkulovski zadatak. Ali, to je izazov koji mora biti ispunjen da savlada mnoge naše moderne bolesti.

PRIČA KOJU KRIJE KOMPLEKS GRAĐEVINA MIHRIMAH-SULTANIJE



Priča je stara pet vijekova, kao takva čuva se i prepričava. Smatra se jednom od najljepših ljubavnih priča svih vremena. Bilo da je čitate vjerujući u nju ili pak tražeći dokaze za vjerodostojnost, neće vas ostaviti ravnodušnim. Mimar Sinan projektovao je i napravio najveće spomenike nekadašnjeg Osmanskog carstva, ali ovaj u sebi krije posebnu ljepotu.

Oko građevina, posebno onih vanvremenske ljepote, oduvijek su se ispredale priče. Neke od njih historičari potvrđuju, o njima postoje pisani tragovi, one druge, nikada potvrđene, usmeno se prenose sa generacije na generaciju, sve dok ih neko jednog dana ne zapiše i nastavi prenositi kao takve.

Ovim drugim, nikada potvrđenim, pripada i priča koja se krije iza kompleksa građevina Mihrimah-sultanije.

Mihrimah-sultanija bila je jedina ćerka sultana Sulejmana Veličanstvenog, kako su ga zapadnjaci kasnije prozvali, u istočnom svijetu je bio poznat kao Kanuni (Zakonodavac), i njegove zakonite supruge Hurem-sultanije. Rođena je 1522. godine. Nazvali su je Mihrimah, princezom Sunca i Mjeseca. Na perzijskom jeziku Mihr znači Sunce, a Mah je Mjesec.

Poznato je da žene rođene u vladarskoj porodici nisu imale mogućnost izbora, kada je udaja u pitanju. Brakove su sklapale prvenstveno iz političkih razloga. Tako će se Mihrimah u svojoj 17. godini udati za Rustem-pašu. Sultaniya nije voljela svog muža, ali je brak podržao njen otac sultan Sulejman, a posebno njena majka, Hurem-sultaniya jer je Rustem bio paša odan njoj. Ovaj brak nije unesrećio samo mladu Mihrimah, u carstvu je još neko patio zbog istog – Mimar Sinan.

Činjenica je da je Mimar Sinan bio stariji od sultanije, ali priča kaže da ga to nije spriječilo da se u nju zaljubi. Kao što je na početku već navedeno, o vezi između arhitekta i Mihrimah-sultanije ne postoji pisani dokaz, historičari smatraju da je to priča koja je nastala u narodu, dok oni drugi ipak tvrde da je Mimar Sinan zaista bio zaljubljen u Kanunijevu ćerku, ali se nije usudio da svoju ljubav prizna. Ipak, umjesto njega, o toj ljubavi priča kompleks građevina Mihrimah-sultanije.

Džamije koje već vijekovima stoje kao spomenici ove ljubavi, nalaze se na dva najljepša mjesta u cijelom Istanbulu. Jedna na azijskog strani, jedinog grada na svijetu koji se prostire na dva kontinenta, na Uskudaru, druga na evropskoj strani, na kapiji Edirne (Edirnekapi).

Priča o ovim građevinama počinje onog trenutka kada ćerka jedihnica najmoćnijeg sultana u historiji Osmanskog carstva Sulejmana Veličanstvenog, Mihrimah-sultaniya, zatraži od Mimar Sinanana da u njeno ime projektuje i sagradi džamiju na Uskudaru. Navodi se da je sultaniya odluku o mjestu na kojem će džamija biti sagrađena, prepustila arhitekti Sinanu. Ubrzo nastaje građevina neverovatne ljepote.

Nakon nekoliko godina, sultaniya poželi da ostane njena zadužbina i na evropskoj strani Carigrada, a Mimar Sinan se potrudi da na želju svoje voljene odgovori na najbolji način. Tada se rađa ideja o džamiji sa samo jednom munarom, koja biva sagrađena na kapiji Edirne. Mjesto je ponovo odabrao sam Mimar Sinan. Priča dalje kaže da jedno munare simbolizira usamljenost arhitekta Sinana.

Ako posmatrate ove dvije džamije istovremeno, sa iste tačke, vidjećete kako sunce zalazi iza munare na kapiji Edirne, dok se u isto vrijeme rađa mjesec između munara džamije na Uskudaru. Ovaj veličanstveni prizor potvrđuje genijalnost i umijeće Mimar Sinanovo, ali i naklonost sultaniji, u čijem se imenu spaja sunce sa mjesecom, baš kao što se spajaju i u trenutku dok posmatrate džamije koje je arhitekta napravio posebno za nju.

Priča je stara pet vijekova, kao takva čuva se i prepričava. Smatra se jednom od najljepših ljubavnih priča svih vremena. Bilo da je čitate vjerujući u nju ili pak tražeći dokaze za vjerodostojnost, neće vas ostaviti ravnodušnim. Mimar Sinan projektovao je i napravio najveće spomenike nekadašnjeg Osmanskog carstva, ali ovaj u sebi krije posebnu ljepotu.

Ako vas put odvede do jedne od džamija Mihrimah-sultanije, pronađite tačku sa koje možete vidjeti i drugu istovremeno, pogledajte zalazak sunca i mjesec, koji se istovremeno rađa, biće to najljepši suvenir koji ćete ponijeti iz veličanstvenog Istanbula.

// izvor: sebilj.net



NEKOLIKO PRAKTIČNIH ODGOJNIH SAVJETA

„Prvih sedam godina djecu učimo kroz igru.

Sljedećih sedam djecu disciplinujemo,
govorimo im.

Od četrnaeste godine djeci pristupajmo kao
prijatelju.“

(Ibn Kajjim)

Najveličanstveniji zadatak je nekoga odgojiti. Gospodar sebe naziva Odgajateljem. Odgojiti djecu je jako težak posao, sami roditelji znaju da ne ide uvijek tako lahko. Primjeri iz života Božijih poslanika nam pomažu da biramo prave metode za odgoj. Tako je Ibrahim a.s. dobio naređenje od Allaha dž.š. da zakolje svog sina Ismaila. Nakon upućenog naređenja, od strane Gospodara, Poslanik odlazi do svog sina, saopćava mu naredbu od Gospodara i kaže mu: „Šta ti misliš o tome?“ Važno je napomenuti da je Ismail tada bio u pubertetu. Djeca u tom periodu žele da sami odlučuju za sebe. Zato ih je jako važno pitati za njihovo mišljenje. Mnogo je efektivnije nego im narediti. Kada nešto naredimo tinejdzeru, automatski stvaramo odbojnost prema zadatku. Ibrahim a.s. je dobio naređenje a prišao je sinu i pitao ga šta on misli o tome. Obzirom da je jako teško odgajati djecu u pubertetu, a tada ih je najpotrebnije usmjeriti na pravi put, roditelje koji imaju tinejdžere u kući, neće ništa koštati da probaju.

Kada naše dijete pravi greške, trebamo im ispričati i našu priču, reći im da smo i mi prošli

kroz sve to i da nas poslušaju, kako ne bi prolazilo kroz iste probleme. Na taj način se gradi prijateljstvo. Kažu da se emocije vraćaju. Ako usmjerimo ljubav, vratiti će nam se ljubav. Ako prema našoj djeci usmjerimo galamu i visok ton, vratiti će nam se visok ton. Kada su tinejdžeri u pitanju, obzirom da oni vole da donose odluke sami za sebe, potrebno je da im dozvolimo da se osjećaju važnim i da određene odluke donose sami.

Nauka je dokazala da osobe koje majka voli, voli i njeno dijete. I obrnuto, ako majka ne voli biti u društvu nekoga, ne voli ni dijete. Pa ako želimo da naše dijete poštuje komšije, nane, poslanike moramo ih i mi poštovati. Ukoliko kažemo djetetu da je nešto „na dugom štapu,“ mi napadamo njihove snove i ne dozvoljavamo im da maštaju i žive svoje snove. Ukoliko ti snovi i nisu baš dobri za vaše dijete (npr. kćerka želi da postane pjevačica), nemojte mu/joj reći da je to loše, da ne treba to biti. Pustite dijete, ono jako često mijenja odluke šta želi biti, možete te snove iskoristiti da dijete bude bolje (npr. ukoliko dijete smatra da je uredu nešto ukrasti, možete ga pitati šta ono misli da li bi moglo raditi željeni posao ukoliko ga policija uhvati da krade)

U djeci ne trebamo ubijati buntovništvo, buntovnici se poslije bore za svoja prava i suprotstavljaju negativnoj zajednici. Na neki način, svi poslanici su bili buntovnici, oko njih su bili ljudi kojima su se morali suprotstaviti.

// Preporod.com

KOME ALLAH NIJE

DOSTA, SVE MU NEDOSTAJE.



**DOSTA NAM JE
GOVORA, NAMA SU
POTREBNI RAZGOVORI...**



**ONOLIKO BRATE VRIJEDIŠ,
KOL'KO DRUGOM SREĆU ŽELIŠ.**



**SVAČIJE SRCE VOLI DA MU SE S
BLAGOŠĆU PRISTUPA.**

**Budimo berićetna voćka koja
će uvijek i svakome, bez obzira
na sve razlike, davati plod.**



Živimo u modernim vremenima i, naizgled, ne fali nam ništa - imamo stručnjaka, specijalista, doktora, instituta, univerziteta, tehnike... Međutim, svakodnevica potvrđuje da nam fali razgovora.

Konstruktivne kahve. Ne govora, imamo govora, nego baš razgovora. A razlika između govora i razgovora je ogromna. U govoru nema ljubavi. Govori se tek onako, da se ispuca čas, da se nešto priča... Suhopranih govora, bez agde, kako to narod kaže, imamo na sve strane. U razgovoru ima i ljubavi, i dobre namjere, i prave svrhe... Razgovarajmo s ljudima, prenesimo im pozitivnu energiju. Ali pozitivnu energiju ne može prenijeti onaj koji je sam nema! Zato, prvo treba obaviti razgovor sa sobom. Onda ćemo voljeti pričati sa svakim.



Poslanik je prema svakom čovjeku pokazivao milost i nije dozvoljavao da ljudi svojim ibadetima sebi otežavaju. Danas, mnogi svojim ibadetima opterećuju sebe i okolinu. Bit će za to pitani. Takvi smatraju da se Gospodar samo njima obraća. Poslanik i ashabi su svojim ibadetima skidali teret ljudima, tješili su druge oko sebe i uvijek im davali prednost nad sobom i u svemu im bili podrška. Suština tvog i mog ibadeta je da budemo mjesto manifestacije Allahove milosti, mjesto manifestacije Allahovih lijepih imena. U predajama stoji: "Milost je bolja od pretjerivanja u ibadetu".



onaj kome ništa ne treba. Zašto naša današnja kultura nama ne da da živimo i budemo ono što jesmo?

Zato što današnjoj zapadnoj kulturi ne trebaju živi ljudi nego potrošači, a


da biste bili potrošač, vi morate stalno željeti da više imate i biti spremni da stalno više kupujete i trošite. A da biste to stalno željeli, ne smijemo vam dozvoliti da se počnete baviti sobom i svojim životom. Zato, evo vam jeftini, ako treba besplatni mobiteli da bez prestanka pišete i primete SMS-ove u kojima nema ničega osim informacije. Evo vam 79 TV programa na kojima će se vrtiti strašno atraktivne, kobajagi, uzbudljive emisije koje vam ne daju da se sastanete sa sobom.

Ljudi zapravo kao da bježe od sebe uvođenjem svih tih pomagala i „olakšica“. To je to. Bježe od sebe, jer su izgubili sposobnost da se raduju, da budu osjećajni, da budu ono što jesu."

” Nama je prividno znanje potpuno pojelo život. Svi hoće da budu bogati, moćni i lijepi. Svi hoće da se podvrgnu estetskoj operaciji. Svi hoćemo da izgledamo, niko neće da bude. Ako mi date lijep, pravilan nos, pune usne, blago zatamnjen ten, možda ću ja izgledati bolje, ali hoću li to i dalje biti ja? Jer, pazite, ja bih rekao da mi živimo u religiji konzumerizma, potrošnje. Ta religija nam stalno proizvodi čežnje, stalno nam nudi iluzije, predodžbe i tako nas stalno odvodi iz nas. I svi danas izgledamo, niko nije.

Nama se danas pokušava prodati priča kojom bi mnogo novca, još više novca moglo kupiti sreću, ljubav, radost i uporno nas se pokušava navesti da zaboravimo da nije bogat onaj koji ima mnogo, nego

//Dževad Karahasan



Ko bude ibadetio na lijep način, imat će i lijep ahlak

Enes b. Malik, radijallahu anh, prenosi:

„Služio sam Allahova Poslanika, sallallahu alejhi ve sellem, deset godina i nikad mi nije kazao ni 'uh'. Ukoliko bih nešto uradio, nikada me nije pitao zašto sam to uradio, a ukoliko nisam uradio, nikada me nije pitao zašto nisam. Allahov Poslanik, sallallahu alejhi ve sellem, je svojim lijepim ahlakom bio iznad svih ostalih ljudi. Nije bilo nikoga ko je bio ljepšeg ahlaka od njega. Nisam dodirnuo ni svilu ni vunu koja je mekša od njegova dlana, a niti bilo šta drugo. Miris kao što je bio miris njegova znoja nisam osjetio ni prilikom mirisanja miska.“

DA LI JE ISPRAVNA DŽUMA UKOLIKO NE RAZUMIJEM JEZIK HUTBE?

Pitanje:

Živim u inostranstvu i nemam uvijek priliku obaviti džumu-namaz u džematu koji je u okviru naše Islamske zajednice. U mojoj blizini postoji više džemata drugih naroda i mogao bih u tim džamijama klanjati džumu-namaz. Da li je ispravna džuma ukoliko ne razumijem jezik hutbe?

Odgovor:

Slušanje džumanske hutbe je farz, čak i kada je muktedija ne razumije. Svaki vjernik razumije bar dio hutbe, jer ona treba obavezno da sadrži uvodni dio na arapskom jeziku u kojem je zahvala Allahu i salavat na Poslanika, a.s., a to svaki vjernik prepoznaje i razumije. Nastojte, koliko je moguće češće, da džumu-namaz obavljate u džamijama u sastavu naše Islamske zajednice, u kojima se hutbe kazuju na jeziku kojeg razumijete, jer ćete tako postići potpunu korist i svrhu obavljanja džume-namaza. Džumanska poruka sadržana u hutbi je važna komponenta ovog namaza.

DA LI ČESTITANJE VJERSKIH PRAZNIKA NEMUSLIMANA IZVODI IZ VJERE?

Selam!

Molim Vas da mi odgovorite da li čovjek musliman izlazi iz vjere ukoliko čestita komšiji nemuslimanu Božić, Uskrs, Vaskrs itd?

Odgovor:

Mišljenja smo da nema zapreke da se drugima čestitaju njihovi praznici, kao izraz dobrih međureligijskih i međuljudskih odnosa.

Radi se o uobičajenim, kurtoaznim čestitkama koje jedni drugima upućuju sljedbenici različitih religija i to ne treba vezati za vjerska ubjeđenja. To što se nekome čestita njegov vjerski praznik ne znači podržavanje njegovih doktrina i vjerovanja s kojima se ne slažemo. Čestitanju ne treba davati značenje koje mu ne pripada.

Pitanje možete postaviti putem emaila: pitanja@rijaset.ba

Na pitanja odgovara muftija prof. dr. Enes Ljevaković

Fetva-i emin Vijeća muftija Islamske zajednice

FACEBOOK

You Tube



ISLAMSKA ZAJEDNICA BOŠNJAKA
U ŠVEDSKOJ

IZBUS

WWW.IZB.SE

BILTEN

Informativne novine

Islamske zajednice Bošnjaka u
Švedskoj

GLAVNI UREDNIK

Idriz-ef. Karaman,
glavni imam

IZVRŠNI UREDNIK

Nezir-ef. Špiodić

E-MAIL:

bilten@izb.se

WEB:

www.izb.se

IZDAVAČ:

Islamska zajednica Bošnjaka u
Švedskoj

SEKRETARIJAT

Mail: kontakt@izb.se

Tel: 0520-49 90 64

Mob: 0763-10 24 47

Adresa: BIS, Åkerssjövägen 10,
461 53 Trollhättan



اللَّهُمَّ صَلِّ عَلَى مُحَمَّدٍ

